

'Sëédhe -bleézë

'ö Pólö -ya bə

Timote

-dhë bhë 'ö =ne

-Wekadhe

1 ¹Ma Pólö 'a Yesu Klito -bha bəme 'ka, kwa Dhame -Zlan waa- Yesu Klito 'ö 'kwa -yaa -gə bhë -an -zo 'kun -wun 'gü bhë, ²ma bhë =ne 'ö 'sëédhe =ne 'a- bə bhi 'ü -kë =ne n gbö 'dhö (-Zlan -wo 'a- =bleé ü -dhë 'üen- -tun -a -wun -dhe -na 'wun gia- -a -wun 'gü) bhë ü -dhë, kö kwa Dë -Zlan waa- kwa Dëme Yesu Klito -wo 'glusë kë ü 'ka, -wo ü 'yënnng yö, -wo ü gbaa =zuöyagluu 'ka.

-Zo -kë -de 'piö -sü me -daan' -wo =suazë -gə -sü

³-Bhö 'to Efezö =ne -kə 'a- pöë ü -dhë kö a 'dho -na Maseduanë bhë -a 'dhö. Bhii me -daan =sua -wun 'ka -me -nu -wo mü; -bhö 'wun =bleé' -an 'ka kö -waan =gbaannu! ⁴-Bhö -a pö -an -dhë -wo wo =kwaä' =kwezü -wun -nu waa- me 'bhema -nu 'tə -bhüö -nu -yö 'ko 'dhiö -sü -nu 'ö -ya kë 'wo nu zaodhe 'ka bhë -an =bleé' -sü -zü. -Zlan -bha me dha -kə 'ö sü -zo -yö -a -bha -sü -bha bhë, 'yaa- 'gblöo -ta. ⁵-A pö 'a- wo 'dhö bhë 'ö tə a- 'piö kö -dho 'ö ka 'gü bhë, ka- kë ka =zuöga 'puu 'ka, kö 'ka pë -nu kë, ka =zuö' -yö kë =yaannu =süë' 'iin kö ka -bha -zo -yö -Zlan -bha -sü bhë, -yö kë 'kpëdhö. ⁶Me 'bhaa -nu =wa 'go zian bhë -a -ta =wa 'to zaobhodhe 'flëëflëë -nu 'piö =wa wo -de -püö. ⁷-Wa 'piö 'wo kë -Zlan -bha tənggəme 'ka 'këë kö wo 'wo bhë, pë -nu 'wo 'go -na -an dhiö waa- pë -nu 'wo me -nu =daan' -na -a 'ka -zogbandhe 'ka bhë, -a 'zü 'ö- -löö 'ö -ya kë me -nu -wa ma bhë, wo -de gia- 'waa- də.

⁸Tɔŋg 'ö 'ka- -ga -na bhë, =waa- 'kun ö 'kun -kɔ 'ka, -yö -kë -së; 'ö 'kwa- dɔa 'dhö. ⁹'Kɛɛ kɛ- wo 'dhö bhë, -yö kɛ ka 'yaan -nɛ tɔŋg yaa -da mɛ kpɛngdhö -nu -wun 'gü; -yö -da -kian' yaa -mɛ -nu, =gɔü' 'gbee- -mɛ -nu, 'gluyaame -nu, =sɔɔnyaakɛmɛ -nu, mɛ -nu 'ö -yö -Zlan 'piö oo, -yö pɛ 'slööslo -nu 'piö oo, 'ö- gbe -bhlë 'yaa -an 'gü -nu, mɛzɛmɛ -nu, mɛ -nu 'wo wo 'kpɔmɛ -nu zɛ -na -nu, ¹⁰=sɔɔnkɛmɛ -nu, gɔɔn- -nu 'sloo 'iin dhoo -nu 'sloo -bha -wɔ 'ko 'piö -mɛ -nu, =nua 'dhɔɔdɔmɛ -nu, =suakɛmɛ -nu, -wobhömɛ -nu 'ö 'waa 'to wo -wo -ta waa- mɛ -nu 'saadhö 'ö mɛ -daan' -wo giagia 'ö bhë 'ö 'waa- -zian -ta 'wo bhë 'saadhö -an -wun 'gü. ¹¹Mɛ -daan' -wo bhë, -yö 'wuntaɔsɛ 'ö -gban -Zlan 'tɔ bhɔ -sü -zɛ 'ö 'dhuë- 'dhoë- -ta bhë -a 'gü; 'ö- -wun -yö tɛn n -ma kö 'aan- mɛ -nu -daan' -a 'ka.

-Zlan zuö -pö -a -bha 'glusë -wun 'gü -sü

¹²Kwa Dɛmɛ Yesu Klito 'ö n pa =faan' 'ka -Zlan -bha yuö 'gü bhë, a- zuö -pö. A- zuö -pö bhii -yö n -yö -zo -tɛn -a -dhë -mɛ 'ka, 'ö n sü kö 'aan- yuö kɛ -a -dhë, ¹³'kô -kë =nɛ kɛ- wo 'dhiö -be bhë a- -wun yaa -blɛɛ, 'a- 'klo bhɔ, 'ö 'a 'si -nu bho -a -gɔ 'dhee. 'Kɛɛ -yö n 'yɛnng -yö 'ö tɔɔ kɛ- wo 'dhiö bhë, pɛ -nu 'a -kë -an kɛ =dhia bhë, n 'ka kɛ -a -bho 'kou dɔ =dhia; -zo -yö -a -bha -sü 'ö yaa kɛ n -gɔ bhë, yö -mü. ¹⁴Kwa Dɛmɛ -yö 'ö -bha gbɔɔ -kɛ n -dhë =va -ziögɔüsüzɛ 'ka, bhii -ya -kë 'ö -zo yö -sü waa- -a -dhɔ 'wo -kɛ n -gɔ yi -nu yi -bha -kɛ do -sü 'gü. ¹⁵'Wun 'a 'dhoë- =blɛɛ'- =nɛ 'wun gia- -mü. -Ka dɔ 'dhe! 'O tɔɔ Yesu Klito -yö -nu 'kpongtaa kö -yaan =sɔɔnyaame -nu dha; 'ö waa- pö =sɔɔnyaame kö -wa -pö ma; ma 'a tɔɔ -a mɛ yaa -an ziɛn. ¹⁶'Kɛɛ -Zlan -yö n 'yɛnng -yö; -ya -kë 'ö Yesu Klito -yö n sü kö 'aan- kɛ 'wun =zuan' do 'ka, -a -zɔn -sü 'ka =nɛ 'kô -kë =nɛ =sɔɔnyaame -nu -gɔmɛ -mü n 'ka 'dhee, -a =zuö' -yö -saa n 'piö, -yö kɛ 'dhö kö -dhekpɔɔ =dhia' -bha, mɛ -nu 'wo dho bɔ 'wun bhë -a -ta -waan -a -wun -dhe 'wun gia- bhë, kö =toëpö -këdhösü -yaan kɛ -an -bha 'ka. ¹⁷Mea-, =toëpö -gludë 'ö 'yaa ga, -Zlan do 'ö 'waa- yö bhë, =bhlëyadhe waa- 'tɔbhɔdhe -wo kɛ -a -bha 'ka 'dhö -kplawo! Amen.

¹⁸Timote, ma 'në, -dhio 'a- dɔ -na ü -dhë =nɛ, a- dɔ 'dhö 'wun 'ö -gban ü -gɔ -wun -bha 'ö -Zlan -wodhiölome -nu -wa =blɛɛ ü -dhë 'dhiö bhë -a 'gbloo 'piö; -wo -nu 'wo bhë, -bhö -an kuɛnnu ü =zuö' 'piö -zian' kö 'ko 'ö kwa -gɔ -zo yö -sü 'gbloo 'piö bhë 'üɛn- ü -bha -sɛ zɛ; ¹⁹-zo yö -sü 'ö ü -gɔ bhë -a 'kun 'gbee-; -wo 'ö 'we -na ü 'gü bhë, -bhö 'wun ma -a -ta -kplawo! Kö -kun 'ö ü zuö 'dho za dɔ ü -bha. -Dhe -ga 'dhe! Mɛ 'bhaa -nu -wo -dhö 'ö waa 'we -a -bha kö 'wo 'wun ma -wo 'ö 'we -na -an =zuö' 'piö bhë -a -ta, 'ö =wa dhoë 'dhö -ya -an -bha -zo -yö -Zlan -bha -sü -kɔ yö zuë-. ²⁰Imene waa- Alezandrë -wo -an 'piö, 'yö 'a -an 'kluɛn bho Satan -bha; bhii =wa 'go mü, waa 'dho 'wun yaa =blɛɛ' -Zlan -gɔ gbɔ.

Mɛ =daan' -wo 'ö -gban =bhea' -sü -bha

2 ¹Pë -blɛɛzë 'a dho ka =kpɔɔ -a -wun 'ka 'ö tɔɔ 'ka -bhea -Zlan -dhë; -ka pɛ -dhe -a -gɔ; -kaa zuö pö mɛ -nu 'saadhö -wun 'gü! ²-Ka =bhea'-

'sedë -nu waa- megotame -nu 'kpekpe -wun 'gü -yö kē 'dhö kö -ya diindhö -sü waa- =zuöyagluu -wo kē -dhö kwa -bha -klu -Zlan -bha -sü waa- 'ta 'sü -kō 'ö -wa 'ta -sü -a 'ka 'ö 'ko -bhlëyadhe -yö -kē bhë -an -wun 'ka; ³'wun -kē 'dhö -sü -yö -së; 'ö- 'yi -yö -kan -Zlan 'ö kwa Dhame 'ka bhë -a 'dhi. ⁴Yö -ne 'ö- 'piö kö me 'ple -wo dha kö 'wun gia- 'ö -dhö bhë -wa dō bhë. ⁵Bhii kē- wo bhë, -Zlan -yö dosen, 'ö me 'ö -yö me -nu waa- -Zlan -an ziën -me 'ka 'ö 'dhö do Yesu Klito 'ö me 'bhee- 'ka bhë -a 'ka. ⁶Yö -ne 'ö 'ö -de nu me 'ple -gō -ta -bō -pë 'ka. -Kō bhë -ne 'ö 'yi 'ö -Zlan -ya -ya bhë, -dhe 'ö -ya -lo, 'ö pë 'ö- -zōn -ne -Zlan -ya 'piö kö 'ö me 'ple dha bhë, 'ö nu -a 'ka. ⁷Pë 'ö -kē 'ö -Zlan -yö n sü 'ö n -ya bōme 'ka kö 'wun 'ö -gban -zo -yö -Zlan -bha -sü waa- 'wun gia- 'ö -gban Yesu Klito -bha -an -bha bhë, kö me -nu 'waa Zuifö 'ka, 'aan- -an -daan- -a 'ka 'ö bhë. 'Wun 'a- -blee' -na bhë 'wun gia- -mü.

⁸-Dhe -kē 'dhö, a- 'piö kö gōn- -nu 'wo dho -bhea'-, -dhe 'oo -dhe 'wo -bha, -wo -bhea'- =zuö' 'puu 'ka. Kō -kun 'wo -naa -wun 'iin 'wo 'dhinaa -kē 'kuë -sü -wun to wo =zuö' 'piö 'ö 'wo -bhea -a 'ka!

⁹A- 'piö kö dhoo -nu -de 'pö, -wo 'dhoë- woë- sō -nu kē wo -bha, -yö kē -a kē -kō gia- 'ka; kō -kun 'ö -kē -dō 'siö 'ka. Kō -kun -kē 'ö 'wo wo -bha wun -nu -pë -kē 'ö dō -an -gō -bha -ne 'yan -to -a 'piö -pë 'ka 'iin 'wo 'sënnng -baa' -pë -nu waa- -zōgō -nu -kē wo -bha 'iin 'ö 'wo sō -sōnnng' 'gbeezë -nu -kē wo -bha. ¹⁰'Kee -an wō -kō -nu -sëebō -nu -wo kē -ne sō -nu 'dhö -an -bha -ne -kō 'ö dhoo -nu 'wo- 'piö kö -an -wun -yaan -Zlan -zo 'kun, 'ö -an -ma kuën bhë -a 'dhö. ¹¹Dhebo 'ö -dhö, -yö 'ö 'to 'to -na me -daan' -wo -bha, -ya diindhö -sü -yö kē -a -gō, -gō -yōō sia- -sü 'ka! ¹²N 'ka 'we -a -bha kö dhebo -yö me -daan' -iin kö -yö -ya gōn- -gō 'dhiö; -a -dua' -mü kö -dhe -yö ga -a -ta diindhö. ¹³Bhii Adan -ne 'ö -Zlan -ya -da -bleezë 'ka -yaan -tun 'vö -da -na; ¹⁴yö do bhë 'zü, Adan kun 'ö- 'bōn -yö -kan (-bleezë 'ka); dhebo -ne 'ö- 'bōn -yö -kan (-bleezë 'ka); 'ö tong 'ö -Zlan -ya -da bhë, 'ö yaa 'wun ma -a -ta. ¹⁵Kē- wo 'dhö bhë -yö -dho dha 'në -nu 'ö dhoë- 'kpō bhë -a -wun 'gü. Dhebo -nu -wo -dho dha 'dhö -oo, 'kee kö -wa kē -naazë -zo -yö -Zlan -bha -sü 'gü, -dho 'ö go -Zlan 'piö bhë -a kē -sü 'ka, -kē 'slööslö -sü waa- wo -bha -de -sü 'tee -sü -wun 'gü.

'Dhiö -sü Yesu -wun -dhe 'wun gia- -me -nu -dho 'kuë- -sü 'ka -me -nu

3 ¹-Wo 'ö 'wun gia- 'ka 'ö -ne: 'Ö -ya kē -ne me -yö -dhö 'ö- 'piö kö 'yö kē 'dhiö -sü Yesu -wun -dhe 'wun gia- -me -nu kpō 'ka -me 'ka kö yuö -së -ne bhë. ²'Kee -yö kē ka 'yaan -ne 'dhiö -sü me 'ka -me 'ö dho kē, -yö kē me 'ö me gbe 'ka 'dho 'wun yaa yö -a -bha -a 'ka; -yö kē dhe do 'kpaan -gōn 'ka; -yö kē me 'ö 'yaa -de -nu yō -dhë -me 'ka -a 'ka; -yö kē dhe -ga 'wun 'gü -me 'ö 'ö -de dō -a 'ka, -yö -kē -nia -kun -së -me 'ka, -yö kē me 'ö -mō me -nu -daan' -sü -bha -a 'ka; ³kō -kun 'ö -kē -de -nu yō 'yi -dhë -me 'ka, 'iin me 'ö- -kō dhei 'dhö 'siö-, 'ö- 'dhi -wo 'dhö 'dhiö- -a 'ka, 'kee -yö kē me 'ö 'lëëlä,

ö -siökuédhe -dho 'yaa- kē -a 'ka. -Yö kē mē 'ö 'yaa pē 'plē bɔ yō do 'sloo ö 'ka -a 'ka. ⁴-Yö kē mē 'ö -mɔ ö -de -gɔ 'kɔɔmɛ -nu -kɔɔn -sü -bha 'ö- -bha 'nē -nu -wa -bhlē -ya -a 'ka. ⁵Bhii 'ö tɔɔ mē 'ö- -kɔ 'yaa -mɔ ö -de -gɔ 'kɔɔmɛ -nu -kɔɔn -sü -bha, -yö -dho ö -zo kē Yesu -wun -dhe 'wun gia- -mē -nu kpö 'gü -mē -nu 'piö mü -dhē -ɛɛ? ⁶Kö -kun 'ö -kē mē 'ö ö =zuö' -dhiē -Zlan 'piö -dēü -a 'ka; bhii -ya kē 'dhö -yö -dho ö -de sü =va 'ö za 'ö =ya dü 'kun 'saadhö bhē 'ö- -bha -ya kun 'pö. ⁷-Yö -dho kē mē 'ö mē -nu 'ö 'waa Yesu Klito -wun -dhe 'wun gia- -mē 'ka, 'wo -tɔmɔdhe -sē -kē -a buëndhö -a 'ka, -yö kē 'dhö kö -kun 'ö mē -nu dho -a -sanzē 'ö dho kē -a -bha -püö dü kwē -sü -gen 'ka.

-Zo -kē -Zlan -bha 'kɔ 'piö -mē -nu

⁸-Zo -kē -Zlan -bha 'kɔ 'piö -mē -de 'pö, -yö kē mē 'ö- -bhlē -ya -sü 'dhö -sē -a 'ka; -yö kē 'wun gia- -blēɛ' -mē 'ka. Kö -kun 'ö 'wo yɔ mü -sü -ziö =gɔü' 'iin 'ö 'wo =naɔ =mɛɛ -kɔ yaa 'ka. ⁹-Wo 'to -klu -sü 'ka 'wun giagia 'ö -kē -bin -sü 'ka 'ö- -gen go -zo yö -sü 'gü bhē -a -bha, =zuö' 'puu 'ka. ¹⁰-Wo -dho -an 'piö -ga -kun -blēɛzē 'ka; 'ö =ya kē =nɛ waa 'wun gbe yö -an -bha, kö -waan =tun yuö zü dɔ -na 'sabla Yesu -wun -dhe 'wun gia- -mē -nu kpö 'gü. ¹¹-An bɔɔ -nu -de 'pö, -wo kē dhoo -nu 'ö -an =bhlē -ya -sü 'dho -sē -an 'ka; kö -kun 'ö 'wo -kē =tɔɔkēmɛ -nu 'ka; -an -kɔ -yö -mɔ wo -de -wun -bha; -wo kē mē -nu 'wo to wo -wo 'gü pē 'saadhö 'gü -an 'ka. ¹²-Zo -kē -Zlan -bha 'kɔ 'piö -mē mē 'ö -dhö -yö kē dhebɔ do =gɔn 'ka; -yö kē mē 'ö ö -bha 'nē -nu waa- ö -bha 'kɔɔmɛ 'wo to 'ö -an -kɔɔn -a 'ka. ¹³Bhii -zo -kē -Zlan -bha 'kɔ 'piö -mē mē 'ö yuö kē -na -a kē -kɔ giagia 'ka bhē, -yö -kē -bhlēzē, 'ö- -kɔ -yö -mɔa kö -yö 'wun =blēɛ' -zogbandhe 'ka -zoyösü 'ö kwa -gɔ kwaa- Klito -nu kwa -bha -kē do -sü 'gü bhē -a 'ka.

Pē =va 'ö -bin -sü 'ka

¹⁴A -dho nu ü 'piö 'ma -dēü, 'a- dɔa 'dhö n =zuö' 'gü; 'kɛɛ 'sēédhe =nɛ a- -bɔ ü -dhē 'dhö 'pö. ¹⁵=ɛɛ, 'kɛɛ =ya kē =nɛ a =glɔɔ -na 'nö, 'sēédhe 'a- bɔ -na =nɛ, 'ö 'ta -sü -kɔ 'ü dho 'ta süē -Zlan -gɔ 'kɔɔmɛ -nu ziēn bhē, -a yö -a 'gü. 'Ma- pö -Zlan -gɔ kɔɔmɛ -nu kö a- -pö -Zlan 'ö 'bhee- -a -bha Yesu -wun -dhe 'wun gia- -mē -nu -dho 'kuē- -sü 'ö 'wun giagia -gban 'lü waa- -a kuēnnupē 'ka. ¹⁶Mɛa, kwa -bha -Zlan -bha wɔ -kɔ bhē, pē 'bhle 'ö- 'gü 'ö -bin -sü 'ka bhē, -yö 'gblüünzē. -A 'bhaa gbe 'ö dho ziö -a -ta 'yaa 'dhö. -Yö -nu mɛbheedhe bun 'gü 'yö -Zuu 'slööslö -ya -bha -kē kpengdhö -sü -zɔn. 'Yö -Zlan -bha bɔmɛ -nu 'yan -yö dɔ -a -bha. -A -wun -yö =blēɛ' -segɔ 'saadhö 'gü 'ö 'kpongtaamɛ -nu -wa -wun -dhe 'wun gia-, -yö -da dhang- 'gü.

Mē =daan' -mē -nu =suazē

4 ¹-Zuu 'slööslö -ya -pö -a -yö sia- -sü 'ka =nɛ: Yi -kaanta -nu 'ka, mē 'bhaa -nu -wo -dho wo -ta yö -zo -yö -Zlan -bha -sü -bha, -waan 'to

me -püö -zuu =suazë -nu waa- -zuu yaa -nu -bha me =daan' -wo -nu 'piö.
 2-Wo -dho wo =kwa' wo -de -zü 'ö me 'yaan- 'kun -me -nu 'iin =suakëme
 -nu 'ö -an =zuö' 'yaa 'dhö gbö =ne pë 'wo- pö -piö 'wo- -da siö 'ö ma
 -banbandhö 'ö 'wo- -ye -an =zuö' -bha 'dhö bhë 'ö 'wo -an bho zian -ta -a
 'dhö. 3 Me -nu 'wo bhë -an -bha me =daan' -wo 'bhaa -nu tɔɔ: 'Yaa -së kö
 gɔɔn- waa- dhe -wo wo 'ko 'sü 'iin -bhöpë me 'ö =ne -yö ya 'iin -a me 'ö -de
 =zian' bhë 'yaa -së. 'Këë kë- wo 'dhö bhë -bhöpë =suu'- -nu 'wo bhë -Zlan
 -yö -an -da kö =ya kë =ne -a -wun -dhe 'wun gia- -me -nu 'ö 'wo 'wun gia-
 dɔ bhë =waa- -bhö 'këë kö =wa =bhea'- -ta, kö -waan -a zuö pö -a -wun 'gü.
 4 Bhii pë 'saadhö 'ö -Zlan -ya -da bhë, =yö -së; -a gbe 'yaa -sanzë -pë 'ka.
 Kwa =dua' -mü =zian' kö 'kwa kwa -kɔ 'kpɔ -a 'plë -gɔ -Zlan zuö pö -sü 'ka.
 5 Bhii -Zlan -wo waa- kwa -bha -bheawodhe -nu 'wo bhë -wo pë 'plë -kë
 -Zlan wö 'dhiö -së.

'Wun 'ö -gban me 'ö Yesu Klito -bha yuökëme giagia -bha

6-Ya kë =ne 'bha dhegluzë -nu =daan'- =ne -kɔ bhë -a 'dhö, ü -dho kë Yesu
 Klito -bha yuökëme giagia 'ka, 'ö 'ü dho -a -zɔn =ne pë 'ö ü -bhöpë 'ka -Zlan
 -bha zian -ta =zian' 'ö tɔɔ -zo -yö -a -bha -wo -nu waa- me =daan' -wo giagia
 'ö 'wo ü =daan -a 'ka bhë. 7 'Këë =kwezü -wun -nu gbe gbe 'ö 'wo -an -gen
 bho -na bhë, -bhö bhɔ -an -dhë =taa' 'ö tɔɔ 'yaa -zo yö -sü 'gbloo 'piö. -Bhö
 'to =zian' -klu -sü 'ka -Zlan -wo -bha. 8 'Wun 'ö -gban -Zlan -wo 'kun -sü
 -bha bhë, -bhö =yɔɔn -a -ta! Bun -kun -së -sü 'ö -gban -bla 'sü -sü, -lö -sü
 waa- =gɔɔn -sü -nu -bha bhë, =yö -së 'këë -a -truën 'gian gbe 'yaa 'dhö. -A
 me 'ö -kë -klu -Zlan -bha -sü 'ka bhë, =yö 'gianzë pë 'plë 'gü, bhii yö =ne 'ö
 'kwa dho bɔ -a -ta kö -tosiadhe 'ö zö waa- -kë -a 'gü -sü 'ö -dhekpɔɔ -dhia'
 -bha bhë 'kwaan- yö. 9-Yö -së kö 'ka ka 'to 'to 'wun bhë -a -bha, 'ka -wun
 'kun 'gbee- ka =zuö' 'gü. 10 Pë 'ö -kë 'ö 'kwa yuö kë -na, 'ö 'kwa -glu gɔn -na
 bhë 'ö bhë; bhii 'ö tɔɔ 'kwa kwa -zo yö -Zlan 'ö 'bhee- 'ö 'kpe kpe Dhame
 'ka, 'ö Yesu Klito -wun -dhe 'wun gia- -me -nu Dhame kpinngdhö 'ka bhë
 -a -bha. 11 'Wun -nu 'wo bhë, -bhö -an =daan'- -a 'ka ü -wo =yɔɔn -a -ta -sü
 'ka!

12 Kö =kun 'ö me gbe -yö 'yan =ziö' -kë ü 'ka, ü -bha -kë -dadhëü 'ka
 -sü -wun 'gü! -Bhö kë me 'ö Yesu Klito -wun -dhe 'wun gia- -me -nu dho
 'wun =zuan' -sü -a -bha 'ka, ü -bha 'wun =blëë'- -kɔ -nu, ü -bha 'ta 'sü -kɔ
 -nu, -dho 'ö ü 'gü bhë 'dhö, ü -bha -zo -yö -Zlan -bha -sü waa- ü -bha -kë
 'slööslö -kɔ -nu -an -wun 'gü. 13 Ü -zo kë 'sëedhe pö -sü -së 'piö me -nu
 -dhë, 'ü -Zlan -wo =blëë'- me -nu -dhë; 'ü -an =daan'- -yö 'dho -yö yöë n -ma
 nu -yi -bha. 14 Gbaö 'ö -Zuu 'slööslö 'ö go -Zlan 'piö 'ö- nu ü -dhë yi 'ö -Zlan
 -wodhiölome -nu -wo 'wun =blëë -a 'ka 'ö me ziizii -nu -wo wo -kɔ -nu kpa
 -a 'ka ü -ta =bhea' -sü 'ka bhë, kö =kun 'ü- -wun zuö ü -kɔ =taa. 15 Pë -nu
 'ö 'wo bhë, -bhö ü -de nu -an kë -sü -dhë kö ü -bha -dho 'dhiö -kɔ bhë me
 -nu -waan -a yö giagia 'ka. 16 Ü -zo kë ü -de 'piö 'ü ü -zo kë 'pö ü -bha me

-daan' -wo -nu 'piö! -Bhö -ya ü 'yaan 'wun -nu bhë -an 'ple 'gü! 'Bha- kë 'dhö, ü -dho ü -de dha, 'ü me -nu 'wo wo 'to 'to -na ü -bha bhë, 'ü -an dha 'pö.

Pë me 'ö këpë 'ka 'ö 'dhiö -sü -Zlan -bha me 'ka -me
-nu dhoë- kë -Zlan -bha me -nu kpö 'gü

5 ¹Gɔɔn- -klöö 'ö pë 'bhaa -kë, 'ü dho 'wun -blee' -a 'ka, -bhöë kë 'lëälë 'ka =ne =dhe 'wo- pö -a -bha ü dë -mü -a 'dhö. -Bhö -dadhëü 'në gɔɔn- -nu 'sü =ne ü dhegluzë -nu 'dhö. ²-Bhö dhoo -nu -deebɔ -nu 'sü =ne -kɔ 'ü ü dhe 'sü -na -a 'ka bhë -a 'dhö; 'ü 'në dhoo -nu -dadhëü -nu 'sü =ne ü dheglu 'në dhoo -nu 'dhö. 'Në dhoo -nu 'wo bhë, -bhö kë -an 'piö 'slë 'ka!

³=Gεandhoo -nu 'wo =gεandhoo -nu giagia 'ka bhë, -bhö ü -zo kë -an 'piö! ⁴=Gεandhoo -nu me 'ö -an -bha 'në -nu 'iin 'ö -an -bha 'në -bha 'në -nu 'dhö -dhö, -yö -an =dua' 'ka kö 'në -nu 'wo bhë, pë me 'ö -an =dua' 'ka -Zlan wö 'dhiö wo 'kpɔme -nu 'iin wo 'kpɔme -nu 'kpɔme -nu buëndhö bhë -wa kë, bhii -a kë 'dhö -sü 'yi -kan -Zlan -dhë. ⁵Dhe 'ö =gεandhe giagia 'ka, 'ö -ya -sü 'ka ö -de -ta, -yö ö -zo -yö -Zlan -bha, -yö -kë =naazë -bhea -Zlan -dhë -sü 'gü pë -dhe -a -gɔ -sü 'ka gbeng waa- lënnɔ. ⁶'Kεε =gεandhe 'ö ö -bha -tosiadhe kë -na -de =dhɔɔbhaapë -nu 'gü bhë, -a 'dhiö -ya -da =ne bhë. ⁷Pë 'ü dho -an -zo -büö -a 'ka 'ö bhë, -yö kë 'dhö kö -kun 'ö me gbe dho 'wun yö -an -bha. ⁸Me 'oo me 'ö -dhö, -yö -dho ö -zo kë ö -me -nu 'piö; 'kεε -yö -dho -a kë 'dhö ö -de -gɔ kɔɔme -nu 'ka. Me 'ö yaa- kë 'dhö, kö -ya 'kan -zo yö -sü -bha; -a -de kö =ya ziö me -nu 'ö 'waa -Zlan -wo -dhe 'wun gia- bhë -an -ta.

⁹=Gεandhe 'ü dho -a 'tɔ -da =gεandhoo -nu 'tɔ -bhüö 'gü, -a -kwe -yö -mɔ 'gɔɔ- 'slado -bha; 'kεε -yö kë dhe 'ö dho gwaan do 'kpaan -a 'ka. ¹⁰-Yö kë me 'wo- dɔ ö këwun -së -bha -a 'ka; -yö kë me 'ö ö -bha 'në -nu -to -së 'ka, 'ö -nia -nu 'kun -së, 'ö -Zlan -bha me -nu -bhlë -ya, 'ö nu 'yename -nu -dhë -a 'ka. -Yö kë me 'ö- këwun -nu -wo -kë -së -kɔ =suu- 'saadhö -ta -a 'ka.

¹¹'Kεε -bhö -kɔ =gεandhoo -nu -dadhëü -nu 'ka! Bhii kë- wo bhë, =ya kë =ne pë -dho -yö -da -na -an =zuö' 'piö, (kö -an 'kan -sü -mü pë me 'wo wo -de -da 'gü Klito -bha zian -ta wo -bha -kë =gean 'ka -sü 'gü bhë -a -bha); kö -an -dho gwaan -sü -mü. ¹²Bhii waa- kë 'dhö kö pë -bleezë 'wo wo -de -da -a 'gü, 'wo- pö wo -dho -a kë bhë, 'waa- 'gü gbɔ; -a -wun =ya -an 'kun. ¹³-Ya kë 'dhö 'wo =nië =ne 'dhe -ta -ma 'dhö, 'wo bɔ 'kɔdhi -nu 'gü; 'ö 'yaa 'to =nië' -sü -de 'sloo -bha, 'wo -kë 'dɔɔdɔme 'ka; 'wo wo -de dɔ me -nu -gɔ 'wun 'gü, 'ö 'wun 'yaa =blee' -wun 'ka, 'wo- =blee. ¹⁴Pë 'ö -kë 'a- 'piö kö =gεandhoo -nu -dadhëü -nu -wo 'dho gwaan bhë 'ö bhë; -wo 'në -nu 'kpɔ; -wo wo -zo kë woë- 'kɔɔme -nu 'piö, -yö kë 'dhö kö -kun 'ö kwa yaagüme -nu dho bɔ -an -ta kö -waan 'wun yaa =blee' -kwa -gɔ. ¹⁵Kë- wo 'dhö bhë 'ö tɔɔ =gεandhoo -nu 'bhaa -nu =wa 'go zian -së -ta 'saadhö =wa ziö Satan 'piö. ¹⁶'Kεε =ya kë =ne -Zlan -wo -dhe 'wun gia- -dhe do -gɔ 'kɔɔme -nu ziën,

-geandhe -yö mü, -a -dua' -mü kö -yö nu -a -dhë. Kö -kun 'ö- -wun to Yesu -wun -dhe 'wun gia- -me -nu -dho 'kuë- -sü -kwaa, -yö kē 'dhö kö Yesu -wun -dhe 'wun gia- -me -nu -dho 'kuë- -sü -yaan nu -geandhoo -nu 'wo wo -de -ta giagiawo bhë -an -dhë -zian'.

¹⁷Me zii -nu 'wo 'dhiö 'sü -na Yesu -wun -dhe 'wun gia- -me -nu -dho 'kuë- -sü 'ka, 'kë 'ö -an -zo 'dhö giagiawo -Zlan -wo -blëe' -sü waa- -a -daan' -sü 'piö bhë, -yö -an -dua' 'ka kö -an -saan' -yö kē =va, ¹⁸bhii pë 'ö -bëen' -sü 'ka -ya -pö: *-Ya kē -ne -du gɔn -yö -mlü -sië' -na, kö -kun 'wo- 'dhi kun, 'yö- pö 'zii: Yuökëme =saan' bho -sü -ya -ma -kun.* ¹⁹Kö -kun 'wo 'wun dɔ me zii -bha 'ö 'ü- -kë 'wun 'ka kö 'wun -dɔa -bha dhe -tɔmɔ -nu waa kē =ple 'iin -yaaga. ²⁰Me =ya 'wun yaa kē, -bhö 'wun -blëe' -a 'ka me 'ple wö 'dhiö kö 'suö -yaan -da me -nu 'wo to -an -bha.

²¹A- -blëe ü -dhë -zogbandhe 'ka -Zlan 'dhö, Yesu Klito waa- -Zlan -bha bɔme -nu 'ö -an sü -an wö 'dhiö =nëe 'wun -nu 'wo bhë 'ü ü -zo kē -an 'piö kö -kun 'ü -an -kë me -zë 'gü -sü 'ka 'iin 'ü- -kë -dɔ me 'piö -sü 'ka! ²²Kö -kun 'ö 'siö -yö kpa ü -ta 'ü ü -kɔ kpa me -ta -bhea' -sü 'ka yuö -nu -a -dhë -sü 'ka -Zlan -gɔ kɔɔ. Kö -kun 'ü -da me gbe 'piö 'ka =sɔɔn yaa -kë. Ü -zo kē ü -de 'piö kö 'ü 'to 'slööslö!

²³Kö -kun 'ü 'yi -de 'sloo mü -kplawo, 'kë -bhö -drɔɔn mü 'dëde 'ka ü 'guudhe -wun 'gü 'ö tɔɔ ü -ta 'yaa 'po -sü 'ka.

²⁴Me 'bhaa -nu -wo -dhö 'ö -an -bha =sɔɔn yaa -yö -kë -dhegbeadhe 'gü, 'ö me 'ple 'yan -yö -da -a 'gü, 'ö =ya kē 'dhö zlöö, 'wo- -wun -blëe; 'kë me 'bhaa -nu -wo -dhö 'pö, 'ö =wa =sɔɔn yaa kē, 'ö- -dhe -yö =glɔɔ kö me -nu -waan =tun -a -wun ma -na. ²⁵-Kɔ do bhë 'ö këwun -së -nu 'dhoë- 'ka. -A 'bhaa -nu -wo -kë me 'ple 'yan 'dhiö, 'ö- -de 'ö- 'bhaa -nu 'dhö mü; 'kö -kë -ne 'waa me 'yan 'dhiö -wun 'ka 'dhee, 'ö wo 'ka 'dho to -bin -blü 'wo -dhö.

6 ¹Me -nu 'saadhö 'wo =nua 'ka, -an -dua' -mü kö -wo wo -gɔme -nu -bhlë -ya. -Yö kē 'dhö kö -kun 'ö me gbe dho 'wun yaa -blëe' -Zlan waa- kwa -bha me -daan' -wo -nu -gɔ. ²=Nua -nu me 'ö -an -gɔme 'dhö Yesu Klito -wun -dhe 'wun gia- -me 'ka bhë, -an -dua' 'yaa -mü kö -wo 'kun -an -bhlë -ya -sü 'ka =woë' -ne wo -nu 'wa kē dhegluzë -nu 'ka. Pë 'wo dho -a kē =zian' 'ö tɔɔ yuö 'wo dho -a kē -an -dhë -ziögöüsüzë 'ka. Bhii me -nu 'wo yuö kē -na -an -dhë bhë, Yesu -wun -dhe 'wun gia- -me -nu 'ö -an -dho -yö -an -kë wo -mü. Pë -nu 'ü dho me -nu -daan' -a 'ka 'ö 'ü dho -an -blëe' -wo bhë. ³-Ya kē =ne me -yö me -daan' -na me =daan' -wo gbe 'ka, 'ö 'yaa -mɔ -a 'gü -sü 'ka kwa Dëme Yesu Klito -wo giagia -nu waa- me =daan' -wo 'ö -gban kwa -bha wɔ -kɔ 'ö -Zlan -wo 'gü -a -bha -an 'ka, ⁴kö me 'ö 'dhö bhë, -de -sü =va =yaa- pa, 'yaa pë gbe dɔ; =ya =yaannu =nëdhö kö 'wun -nu 'wo -gban -wo kpö -nu -bha -a zaɔdhe -da -sü -ya 'kan -na kö -waan bɔ -a -ta -yaan kē -an -gɔ 'dhiinaa 'ka. -Dhe bhë =ne 'ö pë -nu 'wo =druei -nu, 'dhiinaa -nu, 'si -nu bho -sü -nu, 'wun -nu -kun =zuö' 'piö -sü -nu 'ö 'wo go -a -bha; ⁵-Dhe do bhë =ne 'ö zaɔdhe -nu 'ö- 'bhaa -nu =ya kē 'waa yën me -nu 'ö -an

-bha 'wundɔdhe -ya yō yaan 'ō pē 'ō 'wun gia- 'ka, 'ō 'waa- dɔ -an ziēn bhē 'wo go -a 'gü. Pē 'ō -an -zo 'piō 'ō tɔɔ 'wun 'ō -gban -Zlan -bha bhē, -bhɔɔ' -mɛɛ' -kɔ -suu'- do 'bhaa -mü.

⁶Kē- wo 'dhō bhē 'wun 'ō -gban -zo -yō -Zlan -bha -sü -bha bhē, -yō -bhɔɔpē -va 'ka; 'kɛɛ -ya 'ka mɛ 'ō pē 'ō- -gɔ 'ō- -zo kun -a -bha 'ka. ⁷Bhii 'ō tɔɔ kwaa nu pē gbe 'ka 'kpongtaa zō, 'ō kwa 'ka 'dho dho pē gbe 'ka. ⁸Ya kē 'dhō -bhōpē waa- sɔ -nu -wa kē kwa -gɔ, kwa -dua' -mü kō kwa -zuō' 'glu -yō dhi. ⁹'Kɛɛ mɛ 'wo- 'piō kō wo -kɔ -yō pa -naɔ 'ka, -wo -püō 'güandhe 'gü, 'ō 'wo wo -de -nɛng pē -dho -nu -plēēzē 'ō -an -yō -a -bha -pē gbe 'yaa 'dhō 'ō -ya kē 'wo dho mɛ 'ka dhong -zian waa- 'gü -siō' -zian -ta bhē -an -ta. ¹⁰Bhii 'wēüga -dho 'ō tɔɔ pē yaa 'saadhō -a -gen 'godhe. 'Wēü- -dho 'ō bhē -nɛ 'ō mɛ 'bhaa -nu -bha 'ka 'ō -ya kē -an -bhɔ -zo -yō -Zlan -bha -sü -dhē -taa' -gbiin -sü -gen 'ka 'ō -wa wo -de -zuō' -dɔ -gbɔudhō bhē.

'Paanbhowo mɛ 'ō Timote -de -bha 'ka

¹¹'Kɛɛ bhi -zē, (Timote), bhi 'ü -Zlan -bha mɛ 'ka bhē, -bhō bhɔ pē -nu 'wo bhē -an -dhē -taa'! -Bhō -kē kpengdhō -sü, -Zlan -wo -dho kē -sü, -zo -yō -Zlan -bha -sü, -dho 'ō go -Zlan 'piō -a kē -sü, -zuōsaadhe waa- -kē 'lēēlē -sü -an -mɛɛ'. ¹²Ü -bha 'ta -sü -Zlan -bha zian -ta -sü 'ō -zo -yō -a -bha -sü 'ka bhē, -bhō -a -wo -nɛ 'ko 'wo- zē 'ō 'wo to -a 'gü 'gbee- -a 'dhō! -Toēpō -kēdhösü bhē -a -wun 'kun 'gbee-, bhii pē 'ō -Zlan -yō ü -dhɔɔ -kaa' 'ō bhē, 'ō 'ü -zo yō -sü -goo- kun -tɔmɔ -plēēzē wō 'dhiō. ¹³-Zlan 'ō -kēdhösü -nu pē 'plɛ -dhē bhē waa- Yesu Klito 'ō -tɔmɔdhe -sē -kē Pilatō 'dhiō 'ō -bha 'wun -blɛɛ' -sü 'gü -zo -yō -sü 'gü bhē -an wō 'dhiō, a- -pō ü -dhē: ¹⁴-Bhō ü -gɔ 'dho Klito -bha tɔng -dhē sia-, 'ü ü -zo kē -a 'piō, -yō 'to 'slōöslō 'ō pin -taa. -Bhō -a 'kun -sē 'ka kō -kun 'ō mɛ -nu dho 'wun yō -a -bha, -yō 'dho -yō yōē kwa Dɛmɛ Yesu Klito -bha nu -sü -bha. ¹⁵Yi 'ō -Zlan -ya -ya bhē -ya -lo, -Zlan -de gia- -dho -a kē 'ō -wo. Bhii -Zlan bhē -nɛ 'ō mɛgɔtame -va 'ō 'dhō do, 'ō 'dhuē- 'dhoē- -ta, -gludē -nu -bha -Gludē, dɛmɛ -nu -bha Dɛmɛ. ¹⁶Yō do 'ō bhē -nɛ 'ō 'yaa ga, 'ō -dhepuudhe 'ō mɛ gbe 'yaa -mɔa kō -yō -yɔɔn -a -bha bhē -nɛ 'ō -ya -sü 'ka- 'gü. Mɛ gbe yaa 'ō 'yan dɔ -a -bha do, 'ō mɛ gbe 'ka 'dho 'ō 'yan dɔ -a -bha 'gbônggbông. -Bhlēyadhe waa- 'piigbeedhe 'ō -dhō -toēpō 'ka bhē, -wo kē -a -bha 'ka! Amen.

¹⁷Mɛ -nu 'ō -bhɔɔpē -nu 'wo 'kpongtaa zō bhē 'ō -an -gɔ bhē, -a pō -an -dhē kō -kun 'wo -de -sü -va -kē. -A pō -an -dhē kō -kun 'ō 'wo wo -zo yō -an -bha, bhii yaa 'dho to -an -gɔ -toēpō 'ka; 'kɛɛ -wo wo -zo yō -zian' -Zlan 'ō pē 'plɛ nu -va 'ka, 'ō -kē kwa -bha -zuögludhi -wun 'ka bhē -a -bha. ¹⁸-A pō -an -dhē -wo 'wun -sē kē, -wo kē -bhɔɔzē kēwun -sē -nu 'gü; -wo kē mɛ -nu 'ō -an 'glu 'dho -sē 'ō pē -nu 'wo -an -gɔ, 'wo mɛ -nu -bha -nu -an 'ka. ¹⁹-Bhɔɔpē -va 'ō -dhekpɔɔyi -dhia' -bha bhē, -an -bha -dho 'kuē- -kɔ -sē -ga 'ō bhē; 'yō 'wo dho bɔ -a -ta -waan -kē -a 'gü -sü giagia yō.

²⁰Timote, ü -zo kë -Zlan -wo 'ö- -wun -yö tən ü -bha bhë -a 'kun -kɔ giagia 'piö -së 'ka; -bhö 'kan 'wun -gɛn 'flëëflëë bho -sü -nu 'ö waa- -zo yö -sü 'ö -an -bha 'dho -kɔ 'yaa do bhë -nu waa- -da 'wun -nu 'gü -sü 'ö mɛ -nu 'waa- dɔ 'wo- -dhɛ 'wundɔdhe bhë -an -bha! ²¹-A mɛ 'bhaa -nu 'wo- pö 'wundɔdhe 'ö bhë -yö wo -gɔ, -wa 'kan -zo yö -sü -bha. Kö 'go, -Zlan -bha 'glusë -yö kë ka 'ka!